

四庫全書

集部

欽定四庫全書

石倉歷代詩選卷三百五十二

明 曹學佺 編

明詩初集七十二

王英

字時秀
金谿人

自勵

大道何坦蕩出門安所之
吾將肅輕駕獨與萬里期
東望有泰山其高亦巍巍
上摩蒼天表下瞰碧海涯
欲往

一登覽素心良所思俯首眄窮島仰身臨紫微飄遙適
志意慎哉毋疾馳躋高必自下斯言不可違

又

團團匣中鏡皎皎流素光鑒物無遁形妍媸安得藏經
時苦昏翳游塵漫飛揚顧此三嘆息胡為失其常拂拭
去瑕垢精采復煌煌衆污不可染持已貴自臧恒當慎
夙夕惕然以自防

又

歡多苦必至愛洽恩易疏明者達深慮志在慎厥初宅
心貴冲一視有當如無持循勿改轍榮辱乃殊途鄙人
肆僥倖百巧競相須揄揚固可尚詡詡終何如傷哉衛
彌子竊駕悲自愚

雜詩

庭中多佳木枝葉相蔽虧上有雙飛鳥朝出暮還歸和
鳴相顧盼乳哺得所依如何遠遊子泛泛東復西

袁太常閑居詩次師姚公韻

志士何矯矯心與浮雲馳若彼丹鳳翮英豪安可羈名
初領華秩跡已謝黃扉守道為金璞先幾乃知微永諧
平生友皓首以同歸四休遂深契五十諒知非誰當懷
三益我意終無違

哀義士周益詩

步出崇明城遙望城南里天寒饑鳥啼日暮北風起綠
楊何蕭蕭衰草生故壘傍有三尺墳葬此千載士昔時
從戎馬一身赴邊鄙但全手足愛百戰何足畏崎嶇越

關山辛苦乃云逝傷哉有斯人薄俗誠所愧遺風何凜
然聞者皆墮淚

扈從至中都

長淮日東馳衆山驚西北重城壯且麗飛觀高百尺聖
祖昔臨幸玉帛朝萬國酒酣歌大風天威何赫赫今我
神武君昭哉嗣宸極鑾輿斯蒞止祇台森衛翊匪徒事
逸豫弘亮大孝德寵禮加耄倪溥及動與息重光益宣
朗繼美諒無斁所慚載屬車深抱素飡責興言頌王猷

賡歌思戒勅

秋暮田野有作

郊野肅涼颼晨朝溢霜露驅車向高原偶然過田父喜
我相經過坐我茅簷下論談未移時長跪自陳訴區區
鄙野人衰朽誰復顧一女嫁遠方二男在邊戍力耕以
自供晨餐夕無措未知身死日棄置在何所幸逢朝廷
恩優詔免租賦嬉游且自娛聊復保朝暮聽言思慷慨
賤子愧尸素三時飽大官累歲佩華組豈公田野翁老

大益辛苦

題楊郎中寧公勤堂

天道惟至公天運行不息聖人體蒼玄為世垂典則以
公施於政以勤成乃德重華文教敷夏后寸陰惜萬邦
歸里仁百辟凝庶績皇王嗣天統端拱御宸極治功昭
大中宵旰不遑食濟濟羣寮中寧也能儆飭仰惟聖德
尊欽哉思允迪秉志無邪私臨戎屈謀策遂登要路津
寵至愈兢惕大書扁高堂瞻仰自晨夕永言銘諸心于

以懋乃職嘉名與厚祿榮命益以錫

大祀南郊詩

國典昭大祀精禋戒首正紫壇廓清肅金枝耀晶熒犧
牲既在滌玄酒亦芳馨郁郁燔煙舉喤喤鐘鼓鳴袞冕
蒞對越多士肅祇承帝祇儼在上来享助百靈奠陳秩
有奕禮備斯告成宸心益疊疊列象垂冥冥陳詩咏我
將頌德仰聖明

商山四皓圖

吾聞商山四老人乃是秦世之遺民一朝遁入山中去
何事終身甘隱淪是時秦皇御寰宇法令煩苛暴如虎
儒生既坑六籍焚黔首悲愁盈道路渭川東遶咸陽城
流水猶如帶哭聲偉哉四老乃何似有若鴻鵠凌青冥
長松落落瑤草綠亂石蒼蒼滿幽谷採芝一曲意翛然
不管人間榮與辱漢家書幣遠相招忽覩衣冠來入朝
皇儲既定山中去巢許安能事帝堯丈夫全身保名德
四老高風那可得看圖西望意無窮商山雲外千峰碧

丘氏三節祠

苔溪之水日東注驚波渺渺無人渡嗟哉丘家嫂與姑
同時死在波心處伊昔元季兵戈興四郊豺虎何縱橫
貪饒無厭肆吞噬老稚驚奔無處避可憐此嫂與二姑
驅斥匍匐登長途仰天大慟淚流血誓欲全軀守貞潔
行行把轡奔且馳嫂躍入水姑隨之九淵瀾漫奮身入
貞魄下訴馮夷泣雲霧黯慘天無光蛟龍悲吟波浪立
世稱三節近所無不減人間烈丈夫至今明月清秋夜

影照溪水猶模糊
嗚呼溪水湯湯去
不惜過者臨流為
悼惜從來節義可
感人作詩擬刻苔
溪石

送彭秀才從大將軍英公征交趾

春雲欲雨半成雪
疾風吹衣冷如鐵
平明師出將軍行
城頭風高鼓微咽
將軍自昔膽氣豪
身經百戰不辭勞
前年破賊平南交
奏凱歸來功最高
去年從征北塞回
今年又向南交去
幕中賓從多賢良
帳下諸軍盡貔虎
彭生本是江西人
少年今作幕中賓
拂衣仗劍來別我

慷慨南行思致身畫船紅樓魯江水中流放歌北風起
魚龍吹浪渡三江旌旆連雲亘千里炎州到日暮春餘
銅柱山高有故墟金戈鐵馬經行處瘴雨蠻煙盡掃除
榕陰滿地花開遍邊人重覩將軍面將軍出令聲如鐘
詞客吟豪眼如電知君際遇在斯時會見功成日下歸
人生富貴須早致豈是江南老布衣

庖從過夾溝夜宿

初雨過符離雲霞望欲迷垂鞭信馬去傍輦聽鶯啼山

繞行營外溪迴帳殿西夜涼聞鼓角天近月華低

扈從宿臨城

伐鼓更鳴刁風高霧氣消遠山初上月野水不通橋地
迴過三峽花深似五橋應慚屬車末待漏向春宵

夜泊淮河北岸

曲岸風濤靜收帆夜泊舟潮聲隨月上波影帶星流為
客獨千里思家尚百憂通宵暫成寐歸夢到南州

秋初有懷呈曾侍講彭修撰二公

律應清商動涼生大火流梧飄金井露鴈度玉門秋爽
氣消殘暑砧聲報遠愁佳期七夕近乘月却登樓

挹秀軒

勝地風煙外遙山紫翠分花飄萬壑雨簾捲半溪雲鶴
韻林間續樵歌谷口聞不妨招鄭老對酒夜論文

元日朝回奉呈院中諸公

鳳歷頒新紀三元肇此辰風雲雙闕曉雨露萬方春珥
筆長隨輦思家獨念親年年赤墀下喜見歲華新

元日昇平詞

華席中天近祥雲五色多衆星環絳闕一水接銀河花
滿瀛洲樹香涵太液波長年逢此夕恩意共春和

又

蓬萊出霄漢樓殿壓金鰲地接西山近城臨北極高夜
光生菡萏春色泛仙桃遙見旌旗外將軍佩寶刀

扈從度龍門作

邊塞山川壯闕城地勢雄崖傾開鳥道路險瞰龍宮從

隊千旗擁前驅一騎通紆迴多傍澗登陟半凌空雨霽
巖前霧香飄樹杪風雲隨仙仗白花映御衣紅景屬陽
和後恩覃化育中臨高須刻石頌此紀神功

寄和楊之宜春春早侍宴朝回之作

紫微天近九門開玉漏聲殘禁鼓催五色祥雲依黼座
九重春色泛金盃輕風細逐鳴鶯散新柳低迎仗馬回
一曲陽春誰和得鳳凰池上待君來

送南康翁教授赴任德安

白髮栽冠古晉賢十年風雪守寒羶關西不獨推楊震
闕下從來說鄭虔別路斜陽京口樹他鄉明月洞庭船
郡齋南望山如戟還似匡廬舊講筵

送汪生別兄南歸

高歌一曲間清簫曲盡何堪更別離汶水煙波秋日暮
彭城風雨夜寒時行經遠郭聞鷄早望入長江見鴈遲
得到故園春已近滿池芳草不勝思

少年將

豪家十萬羽林兒，壯氣桓桓似虎貔。
賜將官錦繡盤螭春，城走馬花開處。
夜鼓歸營月上時，應是太平無戰伐。
少年行樂正相宜。

朝回宴李君小館有懷

欲寄鄉書過鴈稀，家山長在夢中歸。
天連楚澤波聲遠，雪暗交河樹影微。
每聽隣鷄馳曉騎，多乘殘月著朝衣。
與君退直歸偏晚，把酒相看對夕暉。

榆林直宿有懷邵菴學士對月之作

榆林春夜漏聲遲獨憶奎章對月時
翠袖清歌看駐輦
彩箋紅燭坐題詩
連雲尚有青山在
夾路應多綠柳垂
北望窮荒凋落盡
昔年文物倍增悲

戲馬臺

烽煙三月火咸陽
功業終隨玉斗亡
却歎重瞳非伯主
方知隆準是真王
蕭蕭歸馬旌旗盡
寂寂空臺草樹荒
堪笑英雄還有恨
喑鳴不似楚歌長

題滕王閣

連城高閣起崔嵬
帝子曾經歌舞來
四面簾櫳開曉霧
半空簫鼓隱春雷
緱山謾說乘鸞去
遼海徒聞化鶴回
惟有二王遺刻在
年年風雨長莓苔

又

鳴鸞佩玉憶當年
遺跡荒涼倍可憐
尚有殘花飛蛺蝶
應多古樹怨啼鵑
西山疎雨浮雲外
南浦驚濤夕照邊
何事王孫舊時草
滿堤猶自綠芊芊

勅建東閣新成次曾侍讀韻

中天高閣起岩峩人語遙聞在半霄架插圖書皆御勅
闌懸複道有虹橋雲邊山色疑開畫花底鶯聲似奏韶
自愧清時同載筆相如詞氣獨飄飄

梅真觀

去國長懷萬里憂封章未報忍歸休已無忠諫居三輔
獨有威權在五侯舊館空餘秦地月古壇猶似漢宮秋
傳聞跨鶴三山去不向湘潭賦遠遊

玉泉垂虹

陰崖翠濕雨微收一派清冷萬壑幽雲裏玉虹低映日
天邊銀漢迥涵秋影隨斜月穿林過香泛飛花出峽流
涓涓不向人間去細逐春風入御溝

太液晴波

杜若花深雨露香滿池春浪接天潢樓臺淨寫空中影
日月長涵鏡裏光有象龜龍皆獻瑞無心鷗鳥亦隨陽
應知聖澤深如海已有恩波及萬方

西山霽雪

天近諸峰盡向陽暖融晴雪見春光素華疊映雲霞色
瑞氣多含草木香漸覺層林分遠近遙看空翠出微茫
為語東風莫消盡且留歌咏付仙郎

蘇公圃

避地遙尋高士居滿畦芳草意何如別來劍閣千山月
拋却陰符一卷書使節謾回斜日外園花空發暮春餘
明當移棹煙波去不羨人間駟馬車

舟過孟城

畫船撾鼓過孟城兩岸桃花春水平今夜湖中多好景
直須看月到三更

題蕃將歸獵圖

獵罷陰山暮始歸繞鞍雉兔馬行遲風高不敢鳴笳鼓
只恐防秋漢將知

附周述詩

吉水人有東墅集

題胡氏壽阡

人生會有期斯理迺其常百年能幾何迅若流電光彭

聃孰云壽奄爾之何方自非金石姿壽命焉得長茲山
實靈秀遂此卜幽藏脩短任大化奚必較存亡窀穸為
我宅泉臺為我鄉達識有如此可以齊蒙莊

玩秀軒

華軒臨清流秀色堪攬結霞影相蕩漾波光互明滅花
飛渡頭春帆落洲上月縱觀心目超靜對形神悅應共
滄浪人濯纓笑予拙

黃孝子詩

江黃多孝子至性由天成兵亂母竟失幼小方五齡稍
長每追憶五內為之崩遠尋渡江淮豈憚萬里行辛勤
四十載奔走跡不寧一朝汝水傍相見豁深情所嗟髮
已白猶喜顏尚頽親戚盡歡慶里閭咸歎驚詠歌信不
虛孝行乃見旌遂令盱江上永世揚芳聲

轉蓬

疾風吹轉蓬去去何所止一與根本離飄飄將萬里男
兒既墮地出處每如此嗟我南北人驅馳在官使漂泊

長若斯何由返桑梓

和靖觀梅圖

西湖昨夜天雨雪雪中獨有梅花發一枝冷浸玉壺冰
寒徹重裘咏不成小童附火情更苦白鶴何心向人舞
展圖更覺肌骨清彷彿如從湖上行逋仙一去不可見
俛仰徒令詩思生

羅氏翠筠樓

昔人種竹幽谷裏影落溪流似湘水君今種竹與雲齊

一片蕭森翠如洗簾外脩脩景色幽六月凜凜涼生秋
滿庭蒼雪無人掃三徑清風從客留留客彈琴復吹竹
竹葉陰濃過醺醺倚樓日日對琅玕得句時時刻蒼玉
世人皆愛桃李春花開一片隨紅塵請看歲歲霜雪裏
不見羣芳惟此君

采石寒潮送廬陵郭彛

憶昨扁舟過采石大江東流去無極潮頭如山天際來
奔濤怒噴聲若雷素練風翻忽飄洒似挽銀河向天瀉

當時停棹客心驚
寒徹重裘夢不成
一從來作兩京客
潮落潮生幾朝夕
只今歸去大江東
帆挂寒潮逐曉風
欲作鄉書託潮水
潯陽向上恐難通

題虎

長松落落盤蒼龍
下有猛虎來腥風
雙瞳夾鏡懸秋月
長嘯一聲山欲裂
獨行耽耽勢莫當
百獸辟易安敢嘗
郡中賢侯今始遇
昨夜分明渡江去

題龍

虬龍靈變不可測
蜿蜒歲久蟠滄溟
碧波怒捲若山立
朱橋似欲凌空行
是誰寫此得真趣
白晝高堂起煙霧
慎莫雙眸更點睛
只恐乘雲天上去

賜觀燈詩

今夕逢元夕
歡聲徧九垓
星臨銀漢動
月傍碧空來
紫禁千花繞
金門五夜開
聖情同宴賞
玉漏不須催

又

鰲戴三山出
峒巖勢入空移
來滄海上高視
碧雲中花

嶼霞光動丹崖瑞氣通
喜看多洞府何必訪崆峒

又

魚鑰通宵徹金蓮達曙紅
門開九霄外輦度五雲中
劍佩隨仙蹕旌旗拂彩虹
宸遊多樂事此夕萬方同

兩峰白雲

悵望西湖上兩峰雲往還
孤飛在親舍千里隔鄉關
此去不可遂南行空欲攀
願將披綵服長得拜慈顏

送別

卷三 百五十二
春滿帝王州英年是勝遊西山殘雪在北闕綵雲浮別
思隨飛鴈歸心繫去鷗題詩一相送愁上仲宣樓

楊氏南園

一徑通南麓幽尋不負期看山遙對酒臨水坐題詩深
樹烏啼處長林花發時平生慕棲遁只恐世人知

南歸詩

久客鄉心切舟行何獨遲不愁歸日晚恐負到京期微
雨寒生夕長河水落時故園空悵望煙樹正離離

維揚懷古

廣陵河上路煬帝昔曾過
不見瓊花發猶傳玉樹歌
臺荒衰柳在官廢亂螢多
欲問前朝事悲風起夕波

葛仙壇

白石香巖望欲迷
仙壇下瞰楚山低
靈源雨過花初發
深谷春來鳥自啼
劍氣猶疑射牛斗
丹光常見拂虹霓
世人誰復知行徑
瑶草青青長欲齊

送蕭司訓

天書晨捧出金鑾分教南州早拜官千里不堪明日別
一樽聊盡此時歡官河歲宴冰猶合客路天寒雪欲殘
遙想傳經聽講罷東風應到杏花壇

贈趙駙馬

三春相見鳳凰城春盡重逢在帝京到闕獨承金殿問
退朝同向玉階行清時名譽歸平叔昭代文章重晉卿
况是新知能枉顧殷勤何異故人情

送劉參政赴江西

憲府乘驄久擅名少叅今日被恩榮薇垣挂笏青山近
畫署炷香白晝清北闕曉趨辭左掖西江秋去擁前旌
旬宣自是藩維職應有聲華滿帝京

舟中偶成

野曠天無際舟行日欲斜滿林黃葉落不省是誰家

又

天際雲山出沙邊鴻雁鳴鄉心秋更切何處擣衣聲

踏雪

卷三 百五十二
一路寒山雪未消尋芳不惜碎瓊瑤梅花昨夜將春色
開到溪南第幾橋

南歸

曉奉綸音出建章賜歸新被寵恩光禁城不鎖還家夢
昨夜分明到故鄉

又

鄉心一片若懸旌舟發長河不肯行聖主分明許歸去
東風何事獨無情

石倉歷代詩選卷三百五十二

欽定四庫全書

石倉歷代詩選卷三百五十三

明 曹學佺 編

明詩初集七十三

李禎

字昌祺
廬陵人

題書室

一室廬如斗堆牀置琴書耕讀得閒暇兀坐心自娛天
光在瓮牖席門掛繩樞已忘朝市榮聊依野人居環堵

本隘陋于我信有餘陶然俯仰間八荒在庭除豈但一
榻外六合真吾廬即此自寬裕廣廈空渠渠

梁處士輓詩

涼飈振庭樹殞星當前除伊人此遐逝斂衽歸玄廬翩
翩丹旒揚祖行在須臾衣冠閔重泉體魄寄荒墟浮生
雖有盡令德諒不渝沒世苟無述百年復何如梁鴻有
遺烈千載與之俱

形答影

有形斯有影物理固其常我行爾必偕我息爾乃藏豈
能相依附實此同存亡學仙非無術却老亦有方古稱
彭鏗輩其壽邈難量于今竟安在孰是長生鄉多君為
余勸茲道終杳茫參苓且當止莫若銜盃觴

松石軒

夙有水山癖竟辭天路遊屏跡衡門下愛此松石幽青
松蔭我屋白石臨溪流逍遙曳藜杖撫玩舒煩憂老叟
解吾意負榼遠見投歡然笑相會且共飲數甌倦即憩

石坐時還撫松謳盡此一日樂明日非吾謀

題雙燕圖寄表弟陳汝安

君家吟溪北我家郡城西君家梁間燕我家梁間棲我
從出鎮來寒暑又三變不見故鄉春惟見故鄉燕挈家
吉城邊寓家汴河湄燕識主人心相隨不相離念君千
里隔見君幾時得欲令燕銜書飛歸到君側君能拂吾
塵為理白雲莊願言共君老看燕雙飛翔

琴清軒

有客奉冲素瑶琴何靜淵層軒久絕俗士跡綠綺自上
朱絲絃初彈徵調聲古澹澤國葦寒鳴旅雁再彈堂堂
如迸泉冰盤亂走珠璣圓斯須改調羽仍角灑灑明珠
相續落秋吟瀟瀟見斷雲春和鸞鳳鳴阿閣吾聞伯牙
昔善琴後來不復傳遺音如何到處聽者少悠悠山水
空高深銀箏錦瑟人同喜流蕩注淫愉俗耳衛國誰知
擊磬心齊門孰識吹竽耻三尺焦桐只獨怡希聲大雅
世豈知但令妙解徵絃趣不必黃金鑄子期

題徐太守所畫推篷梅花圖

紛紛卉木凋零早獨有江梅冬更好天寒歲晏風泠泠
野渡無人流斷冰南枝爛漫北枝少恍如玉貌千娉婷
自憐隨月印沙影更愛臨崖近水形當塗太守今黃霸
名重華光補之亞酒酣自寫復自題餘子持縑終不畫
半開盛吐俱含態將飄乍落皆有情玲瓏輕霰簇鏤玉
蕩漾明珠疊碎瓊昨來盧君新卷裏寫得長梢最妍美
踈蕊凌寒似得春暗香撲鼻疑生紙世間畫手多凡流

惟數徐君筆最優不必掀篷掉飛雪觀圖何異在扁舟
題三友卷

世人結交結貨利知君結友與人異半生締交只三物
對之不言心已契偃蹇虬龍當檻蟠冰魂翠袖靜相看
因悲薄俗隨冷煖聊托幽芳共歲寒願君終身勿相棄
豈必彈冠復聯袂苦口雖無藥石言同心實有金蘭義
君不見紛紛輕薄流朝作刎頸暮作仇人情真似翻覆
手三友貞姿寧易求

栢室

楊家住在南山側不種棠梨惟種栢棠梨開落易衰榮
栢也亭亭色鎮清屈曲靈根蟠厚地崔嵬鉅幹拂高冥
天風乍起生竽籟撼屋驚濤忽澎湃雷霆白晝走蛟鼉
雲霧中宵見光怪良材自有神明扶下視凡木皆庸奴
狄門桃李敢爭艷田氏荆花差可徒楊郎愛之如愛寶
四季俱宜夏尤好赤日行天暑不知濃陰覆地涼偏早
孔明廟前根久枯御史臺中樹亦無何似君家書屋外

蕭蕭寒翠兩三枝

昔年謠示七郡父老

昔年我來徵需重爾有田園何暇種今年我來民差好
諸般免却無煩惱昔年逃夫今不追昔年逋租今不賠
今年頻赦昔年罪昔年流移仍撫綏白頭父老來汝告
朝廷厚恩要補報便應差徭莫逋糧休學樗蒲致為盜
勿為盜兮輸官錢男治稼穡女治綿俗皆淳美人晏然
我亦思如召伯賢

陌上桑

曛曛曉日艷陽天此時秦家蠶正眠春深桑葉嫩芊綿
羅敷採摘出城邊東條西條相糾纏滿目淑景麗且妍
繁紅芳紫萬仍千輝煌宮錦絢晴川照見羅敷貌嬋娟
髻雲倭墜鴉色玄步搖斜挿釵鳳偏冰姿何曾屑丹鉛
香齷皓齒疑貝編眉橫青山黛初填杏臉細膩霞暈鮮
項如蝤螬搓玉圓額角斜貼翠花鈿寶璫耀耳瑪瑙懸
袞拖秋水籠步蓮月鉤窄小進難前胸垂緩帶繡鸞鵲

同心綰結一雙聯暖風披拂飄蘭茝從傍過者驚復憐
盡道羅敷是神仙使君駿馬來翩翩下馬揖贈黃金錢
欲同攜手共周旋羅敷低頭久默然逡巡微聽細聲傳
自陳未笄窺簡篇頗知禮訓守貞堅閨房節操雪霜蠲
瑩比明蟾照清淵夫君豪俠稱英賢才無文武實兩全
驂騑絲轡象牙鞭麒麟鎖甲劍龍泉揚麾分符領兵權
雕戈畫戟擁旌旃旒蘇複帳駝絨羶博山亂噴沈水煙
侍兒濃抹森後先霞綃長袞舞褊褊左迴右轉信輕便

舞罷巧按鷗鷄絃烹羔刺豹開瓊筵蒲萄名酒滿觥舡
犀筋不下飫腥羶夫君歡娛無與肩羅敷嘉言皆陳宣
陳竟斂衽攜筐還人生妃匹本定緣使君有妾諒盛年
丁寧疾驅歸去遄結髮義重勿弃捐

漢武帝將軍栢歌

茂陵求仙期得仙思驂玄龍飛上天密函秘簡事封禪
宛馬馳來崧嶽前崧前獨愛三樹栢錫以官名表殊特
至今猶說是將軍香葉屯雲凝翠色當時立身隘八埏

一舉欲息崑崙巔窮兵黷武事遠畧此豈解有冲昇緣
秋風亂哀萌晦早王母桃花幾回老金莖瑞露成清淚
珠襦玉匣埋荒草羨渠老壽在名山駐齡弗藉文成丹
詆諧獲聽方朔論侍從曾識枚臯顏禿枝銳幹如銅鐵
傲雨凌霜古皮裂地籟朝驚萬壑風精靈夜泣三更月
武皇不歸時代遷遺爾擁腫煙霞邊莫疑孔檜頗相妬
且喜社櫟能忘年

春日山中尋泉

春泉試獨尋度壑復穿林忽見流紅遠方知入翠深
色渾因悟雨聲澹只疑琴盥弄忘歸去窮泉空有心

送人南歸

離絃兼楚調忍向醉時聞連歲長為客他鄉更別君
鷗波明夕照雁字寫秋雲迢遞還鄉夢相隨過海濱

百年同旅寓大半在殊方白髮羞明鏡青山問故鄉
落霞秋水濶新雁暮天長安得隨君往溪南訪草堂

候館傳盃處扁舟欲發時歸帆投遠浦斜日隱層垣
暑

退秋來早潮生月上遲經行逢勝槩都付酒中詩
年年長在客北薊復南京秋雨滄洲雁春風采石鶯好
山環故里流水背孤城去住無拘繫閒身到處輕

寄蕭教諭

聞說崑山縣孤城在水鄉汐潮通海近雲樹接天長夏
暑汚田熟秋陰學舍涼年年春色裏桃杏爛官牆

喜張進士叔豫見宿旅舍

窮巷寂無隣青燈共故人遠聲霜下磬孤影客邊身砌

冷蛩相弔庭寒月自親
殷勤一瓢酒更與話酸辛

送陳生歸吉水赤岬

清砧蕪落葉總是別離情
去路千程遠歸舟一葉輕
秋雲連樹暗寒日映川明
亦有滄浪興何時共濯纓

送周秀才遊長沙

迢遞長沙道蕭條晏歲遊
亂山黃葉寺孤棹白蘋洲
夕鳥衝船過寒波背郭流
毋論卑暑地賈傅昔曾留

周原幽居

山色蛾眉秀江流燕尾分
亂蟬吟落日獨鶴引歸雲
黃葉谿邊樹青帘雨外村
興來留客坐隨意倒芳樽

送戴教授北行

別路三春雨行舟五兩風
花香隨路減柳色上衣濃
共是青雲客先成白髮翁
離情如逝水萬折亦朝宗

送人之京

上巳風光好新晴物色妍
青山林下屋綠水鏡中船
節換榆煙火花殘穀雨天
壯遊逢勝景況近五雲邊

送李生還安城

北薊辭嚴父南京別故人一身勤遠道千里念慈親
柳暗江城曉萍香野岸春燈花先報喜應更倚門頻

己亥除夕房山營中作

患難仍連歲蹉跎獨此身風塵雙短髻宇宙一羈人
入曙繁星沒凝寒積雪新椒花今夕酒祇是強沾唇

宿廢普濟寺

青山行欲盡深樹見僧房雲氣千峰暝秋聲一院涼
長

藤懸破衲脫葉覆空廊龍象黃金地蕭蕭蔓草長

三月四日即景

忽忽春將暮俄過三月三草誰憐益母花自媚宜男乍
到尋巢燕初眠上箔蠶新茶與穉笋鄉味憶江南

賦落花

愁紅怨粉各依依樹下偏多樹上稀總為春光爭艷冶
却教夜雨妬芳菲數枝浸水魚吹去幾片縈林蝶趁飛
莫教東風成薄幸猶能收拾點人衣

孝陵秋日陪祀東彭贊禮永年

鍾山欲曉色蒼蒼小輦輕輿出建章
苑鹿不驚仙仗過潭龍故噴御泉香
重城隱霧留殘月高樹含風送早涼
惟有祠官最清貴時來導駕沐恩光

送熊生還鄉

石頭城下柳蕭疎久客懷歸念遠途
鄉夢每生鐘斷後客愁偏在酒醒初
扁舟暮雨青衫薄折葦涼風白鳥孤
擬共丘園尋別業臨岐相送獨踟躕

訪鷺洲書院遺址

宋家書院但空名二水中分草樹平陵谷變來基亦沒
野人耕處草還生落花細雨文魚上殘柳西風白雁鳴
臨眺不堪懷往事城頭畫角更淒清

送李生赴會試

明時自笑久離羣中歲仍傷送別頻暮雪梅花殘臘酒
東風楊柳上京人仲容年少青雲早杜牧才衰白髮新
昔日戰場已成夢天涯空憶杏園春

舍弟客錢塘索家書寫此示之

故園書信久荒涼
愁對西風見雁行
身在京華依魏闕
夢隨潮信到錢唐
乍添老態經憂患
漸入中年易感傷
閒對白雲惆悵久
不知清淚已沾裳

寄刑部李主事時勉周主事恂如

二妙翩翩最好辭
拜官同在白雲司
一身多難憑誰問
三載離羣獨爾思
紫陌香塵聯轡處
絳紗銀燭候朝時
才名獨數臯枚盛
肯把新題寄所知

明妃引

年少如花掖庭誰能不戰屈人兵黃金莫鑄將軍印
妾去防邊萬里城

君王莫遣妾行遲冒頓由來愛少時只恐紅顏易衰老
宮中更預選蛾眉

舞陽留侯廟

信族猗夷越醢躬太平無復用英雄高皇却墜先生計
世上何曾有赤松

人心變幻幾千般帶礪盟深亦易寒秦網逃來逃漢網
誰將此意語蕭韓

山路謔花

枝頭地上總猩紅幾樹繁開幾樹空顏色一般榮悴別
誰將此意問東風

山中牡丹

不煩澆灌不煩栽長過清明穀雨開為問洛陽豪貴客
幾家還有舊亭臺

嵩縣遇端午

老大偏多故里心
一逢佳節一沾襟
誰知此日菖蒲酒
迢遞山城獨自斟

附劉士皆詩

泰和人仕
至憲副

金谷園

金谷渺何許
邈在洛城闐
借問作者誰
晉代石季倫
念昔初建時
氣勢亦何殷
兼金買寸地
豈惜寶與珍
園池極侈麗
臺榭窮魚輪
但恐已樂違
寧顧閭里貧
遙遙步

錦障錯襍綵繡紋眉沈試輕體燔蠟代為新翠釜出駝
峰玉盤薦猩唇醒揮鐵如意珊瑚輕若塵平生知己友
二十有四人事異各已去伊誰仍見親賴有墜樓妓雨
泣情殷勤雖能効微節寧復免爾身倉皇死生際徒供
奴輩嗔至今園上草寂寞伴宵燐我來一經過駐馬立
荆榛俯仰重裊徊感慨臨風頻

銅駝巷

古陌名銅駝蒼茫滿荆棘駝亡知幾年猶自紀陳蹟想

其營度初正當漢盛日盡銷天下兵乃足資融液煇鞠
勞鬼工呵護煩神力一瀉遂成形儼與生駝匹崔嵬兩
峰高峻拔千金直有時夜嘶風萬獸猶辟易鼎湖龍已
去中原鹿再失區區銅臭軀誰復重愛惜我昨一經過
尋踪空太息駝兮如有靈好共金仙泣

天津橋

洛陽天津橋乃是隋所造煬帝久已亡斯橋猶自好云
昔初建初督役苦凌暴萬姓困莫當妻孥不相保疊石

皆膏脂塗地總肝腦雖能不日成未免逆天道自從登
綵舟甘向揚州老橋上雖繁華龍輿不復到空餘杠與
梁縱橫走羣盜吁嗟煬帝心何事太顛倒人意旣已離
安能事窮討汴水日夜流波濤終浩浩似有哀痛音怨
君苦昏眊我來數經過臨風亦嗟悼何必聞鵲聲自然
傷懷抱

杜康宅

杜康有故宅洛陽城西臯宅廢人已往空餘石酢槽槽

傍有古井香泉流滔滔至今人汲釀展轉費桔槔古有
儀狄氏作此心甚勞大禹始飲之輕棄如鴻毛云何百
世下爾術尤更高麴蘖苦糜爛草木困烹熬河中取桑
落中山製松醪洞庭醞柑橘大宛煎蒲萄遂令謹厚士
化作兇憮曹充池或以酒築臺或以糟臺可望十里池
可容數艘敗亡由繼見節義誰復操我生重懷古感此
心酖醕吁嗟乎杜康爾責將焉逃

耆英堂

文潞留守時富韓方釋位構堂聚洛賢作此耆英會于
行十三人人總名貴鬚眉既皓然衣冠亦甚偉每當
風景妍車騎輒馳粹都人競隨觀自以後為愧吾嘗慕
其人仰之若巨貝恨不生同時殷勤為擁篲堂空已多
年苔蘚失遺繪仰止重裴徊臨風起長喟

范文正公墓

范公天下士意氣隘九州平生一片心未嘗為已憂自
從參大政廊廟多謨猷胸中百萬兵徃徃震邊郵為政

尚平易所至民歌謳立祠畫公像無問去與留奉賜有
餘資恤匱力不休廣置義田宅豈惟輕麥舟斯人已淪
謝遺塚尚如丘停驂躬拜謁仰止思悠悠

望氣臺

昔人已乘青牛去海濶天高幾昏曙空餘百尺望氣臺
至今猶在經行處傳說當年函谷關常有紫氣來其間
世人俗眼不能識徃徃輕視如等閒惟有關門令尹喜
自言當得異人至築臺望望未多時果遇東周柱下史

從容授以道德經五千奇言皆至精飄然拂衣不肯住
移車又向西川行川西迢迢路脩阻喜即辭官遠趨赴
青羊觀裏忽相逢一笑呼名宛如故此邦傳道實所宜
如何又有終南期遂令喜也雙倦足終歲碌碌無寧時
青牛老人去不返寂歷荒臺猶在眼登高披棘考遺蹤
落日亭亭春正晚

會盟臺

沔池之水深且清傍有危臺如砥平秦趙二君雖已矣

偏留遺土稱會盟憶昔昭王彊盛日六國聞風皆辟易
一朝忽忍割連城殷勤欲買楚和璧當時誠偽未可知
藺公何事去不疑秦果無意償其地公然完璧間行歸
自是兩國生嫌隙禍結兵連歲無息千里築臺號結歡
果為鬪智與鬪力趙既從容鼓瑟希秦不擊缶將焉為
豈知壯士五步內欲以頸血親濺之

經陳平廟

梁棟高材冠玉姿蓬門瓮牖整栖遲里中作宰人稱善

蒲曲封侯孰見期
躡足可回真主怒
間金能起霸王疑
平生功業多如此
不獨平城一策奇

大梁八景次都御史王公韻

寶刹浮圖聳碧空
霜天處處坐聞鐘
繁臺春盡花如露
汴水秋深夜亦風
月映周橋千頃碧
煙凝隋柳一堤濃
黃河日夜濤聲吼
似出金明雨意中

陝州

召伯棠陰翠作堆
神農祠下總蒿萊
三門砥柱今猶在

並蒂芙蓉久不開
繡嶺嵐光凝禹廟
錦灘春色上仙臺
姚崇已矣齊賢逝
翹首臨風憶俊才

河陰

教倉屹屹對峭關
廣武蒼蒼夕照間
一片雲生牛口谷
幾家人住虎頭山
英雄割據鴻溝在
王霸興亡白晝間
往事茫茫只如此
臨風何必起長歎

鎮平

百里雲山簇鎮平
四時風景快人情
菱花池曉天光淨

燕子崖深霧氣清舊業獨憐先主廟遺蹤空見故侯城
登高弔古頻惆悵樂極翻令百感生

劉昭年

字昭昭
萬安人

蠶婦歌

朝采桑兮暮采桑不愁露濕沾衣裳只愁蠶多桑葉少
穠枝摘盡難盈筐歸來撫筐仍歎息幸得三眠事將畢
曉粧不施頭不梳冒雨衝風幾朝夕今年且得蠶倍熟
自是貧家常不足繰車捲雨聲暫停白雪紛紛上機軸

麓將織紬細織羅淨者作絹供徵科織得紬成無絹裏
小姑咄咄訴阿婆阿婆重女如金寶妾身寸絲那敢道
但願家和隣不欺百歲團圓永相保夫兒語妾莫憂煎
春風尚可期明年

贈人遠遊

飲水莫飲山中泉種田莫種山頭田山頭之田多荒蕪
山中之泉愁易枯知君平生江湖散意氣直欲凌雲漢
江海茫茫萬里間取之不竭用不殫夜雨連疇禾黍繁

春風蕩海波濤翻山中之水能幾何先生有口如懸河
安能嗜此一勺之餘波即今飄然出山去買舟已在江
之沱上堂別尊親滿酌金叵羅萱花未老荆樹茂酒光
入面朱顏酡出門一笑天地濶蓉山回首空嵯峨龍魚
躍淵須變化獨鶴豈在羣雞亞丈夫有志輕別離淚痕
莫濕香羅帕君不見袖中三尺劒光寒王侯眼高定增
價

彭介翁以詩見示次韻一首

俗事不可遏滿眼約牛毛怡然心自如拭以快劍刀一介
固所守萬死且不逃嗤彼世間人汨汨徒形勞嗟嗟陋
巷賢此樂何其高

正月十六夜聞雷

飲罷燒燈酒初聞第一雷震陽從地復春令自天催草
木萌芽動龍蛇蟄戶開喜沾新德澤和氣藹然迴

感春

東風情太薄起處不由人詩酒無窮恨乾坤幾許春青

陽過眼易白髮上頭新欲學乘槎客茫茫莫問津

黎原良為事再起賦詩以贈

天道豈不常人情固無定如何翻覆間陽光有時溷好
風忽東來長空靜如鏡顯晦理自然達人貴知命

懷王孔堂

昔年先覺宦情閑歷歷燕山眼裏看驢背雪花詩思逸
馬頭雲陣劒光寒高標已老梧桐鳳壯志還棲枳棘鸞
別去蕭然人不見夢中猶自想衣冠

閒居偶成

明月清風老此山
山中歲月任循環
抱琴有意客不到
出岫無心雲自閒
鼓浪淵魚休踴躍
知時林鳥任間關
寥寥情思渾無賴
獨立溪南碧水灣

九日懷歸故居

欲別東山老故丘
催年白髮半盈頭
他鄉作賦悲王粲
異代掄材愧馬周
明月雙江無限興
西風三徑為誰秋
心期好與黃花約
細酌橙香酒似油

同登鳳凰臺

輦路清風淨曉埃
曳裾同上鳳凰臺
天連帝闕雙龍迴
山繞都城萬雉開
吳舫乘潮隨港入
淮雲將雨過江來
百年重喜瞻儀彩
聖德光華徧九垓

歸舟

三吳春色動歸舟
夜出宮城次石頭
雁帶楚書回朔漠
櫓搖淮月下揚州
聖朝王氣乾坤後
南國恩波日夜流
野性自安麋鹿伴
旅魂空遶鳳凰樓

題五橋隱居圖

誰家作橋溪水頭茆堂四月如清秋白雲已過暮山碧
黃鳥不鳴春樹幽紫髯背向孤舟立記得仙源舊曾入
雨打疎篷醉不知桃花一夜新流急

贈張伯庸起復赴京

幾年歸隱老東陵今又承恩謁帝京夜雨西窗情話冷
朝雲南浦別懷并邵平秋後瓜猶種賈誼時來策易成
此去長安仍走馬楓林楚水莫關情

壽廖周廷

四十年前老作家通津橋外興無涯
柳營曾佩將軍印
星漢空浮使客槎
綠野耕閒黃犢健
碧潭釣寂白魚嘉
如今喜得身無事
酒後題詩飯後茶

思家

春老山中甕裏醅
持螯空憶舊時杯
看雲華表曾垂柳
踏雪羅浮幾訪梅
白晝了無塵俗累
清風惟有故人來
歸心一掬濃如酒
擬棹扁舟得意回

江邊口占

滔滔流水幾時休
欲借滄浪為洗愁
茆屋數家人不見
淡煙疎雨一漁舟

題昭君出塞圖

馬蹄踏踏暗龍沙
馬上懷恩憶漢家
自是玉顏多薄命
空將哀怨寄琵琶



石倉歷代詩選卷三百五十三

欽定四庫全書

集部

石倉歷代詩選卷三百五十八

四至

詳校官編修

臣謝振定

侍讀臣孫球覆勘

總校官進士

臣朱

鈐

校對官中書

臣田

尹衡

校

膳錄監生

臣洪

燮

欽定四庫全書

石倉歷代詩選卷三百五十四

明 曹學佺 編

明詩初集七十四

周忱

字恂時
廬陵人

藏書室

素性昧生殖貯積維簡編羣經既並蓄百氏無棄捐所
至每充棟來往勞車船及茲獲安居插架牙籤懸寓目

自忘倦課孫猶拳拳豈徒事佔畢對越希聖賢

凝嵐軒

開軒面東岑遠近壓羣峰峰頭有嵐氣旦暮生晴空映
日飄几席因風媚簾櫳幽人樂宴坐極目開軒窗青楓
墜濕翠白鳥穿溟濛支頤每自適清樂誰能同

愛蓮軒

嘉卉比君子亭亭植清時出污色不染過雨葉更奇我
家濂溪翁自昔偏愛之後人豔高誼種之益蕃滋碧香

或送酒適意還題詩酒香遠愈好每與南薰期

多稼亭

我家在田里早習耕與鋤頻年飽祿食揣分慚農夫得
歸理先業棄壤成膏腴秋來稼初熟藹藹黃雲敷登場
未溢廩先擬輸王租所希食其力敢憚四體劬

寄遠曲

藕絲繫樓船欲挽安得止女子不出門丈夫志千里終
日聽君言歸期已難擬況此隔三秋音書無一紙相見

不恨遲相思不能已願為漢相如勿學蘇季子相如太
薄情文章嬾青史季子誇金多徒令愚婦喜

徐州過桓山宋司馬桓魋之墓

愚哉宋司馬仲尼安可輕欲害其如何不知天所生此山昔葵
骨廢穴尚留名宿土消含飯飄風散精靈日中狐兔集夜
半鷗號鳴當其崇建時久遠勞經營荷鍤萬夫集石柳三
年成詎知百世下牧豎來縱橫君看孔林樹千古猶青青

夢親堂

人心畫所思夕暮形夢寐感通在積誠默默恒相契憐
君七尺軀失怙自童穉庭訓不及聞甘旨何由致昨來
薦蘋藻君蒿格誠意音容接髣髴綠服疑趨侍雞鳴恍
惚間枕簟空流涕羹牆與手澤觸目多悲思夢時此心
存夢覺心豈異永懷罔極恩欲報知無計勗哉期立身
顯揚紹先志

史節婦詩

淒淒霜露零杳杳鸞鳳析呱呱襁褓兒慘慘床帷夕長

嗶向青冥所天成永隔蜀月旅櫬孤吳雲故山逖險坎
固多虞生死寧復惜迢遞履道途艱難構窀穸豈惟倉
卒間歲月終感激晚節力在今矢心良自昔礦石尚或
磨精金猶可革此心比金石千古終不易

送子宣

我家白沙渚君住桐江頭我家門前水亦向桐江流我
行為客久十載京華留昨來過彭澤一汎南湖舟瞻望
故鄉水衷情思悠悠况此故鄉客同宗復綢繆去家六

千里相見薊城陬見君令我喜別君令我愁君歸桐江
上為我報汀鷗乞身在旦暮忘機共優游

元夕禁中觀燈應制

都城雪霽春融融月輪皎潔當晴空喜傳恩詔出三殿
洞達天門開九重神鰲來自滄溟裏背擁仙山翠如洗
樓臺氤氲瑞靄凝巖巒縹緲祥煙起銀燈匝地生光華
點點星毬籠絳紗上林萬樹彤霞影東風一片芙蓉花
是時仙仗臨丹陛五雲高捧鑾輿至闕下旌旗虎衛嚴

花間劒佩千官侍大庖列饌御筵開教坊合樂歡相陪
鏡歌聲逐簫鼓發綵隊舞隨干羽來番夷稽首擬丹宸
御鑪馥郁香煙紫中官促宴酒如澠羣臣既醉天顏喜
覃恩不但徧朝堂此夕歡娛同萬方至仁覆育同天地
治化久矣趨虞唐小臣幸濟昇平世傳柑幾度沾恩惠
願効三呼比華封共祝皇圖千萬歲

病驥圖

吳興父子俱能畫捉筆徃徃追曹霸當時託意知為誰

惻愴令人傷此馬此馬虺頽未可輕昔除八駿天衢行
綵雲禁禦春如海曾聽玉輅和鸞鳴一朝謝病離天仗
骨聳毛焦氣凋喪耻與駑駘競粟芻自甘偃卧沙丘上
孫陽去後苦難逢寂寞誰加剪拂功羈金絡玉復何日
顧影懷恩悲晚風古來千金市駿骨况此精神那可忽
飼餼重歸十二閑猶堪萬里奔騰出

棄婦辭

回車已嫁衡門下將去復留情不捨舉家欲語畏郎嗔

獨自登車無送者，吞悲惟恐路人知。默默還思初嫁時，
父母殷勤受明禮。良媒宛轉來通辭，入門郎聽舅姑語。
婦道營生在勤苦，淡粧不用畫蛾眉。朝采蠶桑暮機杼，
亦知朴陋人所厭。習成天性終難變，丈夫有才常好新。
賤妾薄命何嗟怨，繅絲在車猶未除。亭午當炊誰下廚，
但得新人亦似此。庶免高堂煩老姑，到家無面見隣姬。
獨掩寒閨雙淚垂，少時只恨青春促。今日方愁年老遲，

蘄州送別易副使

江頭柳花白如雪江上行人正催別欲把長條贈遠行
蕩颺花飛不堪折今年花飛猶去年此時一去何時旋
含情再誦江淹賦如在桃花潭水邊望君重來在早晚
顧君不道蘄州遠君看柳絮雖無情猶自隨風逐飄轉
尋天台李道士齋

瑤草迷行徑丹臺近赤城山川遙在望雞犬不聞聲谷
靜松花落橋橫澗水鳴雲間雙鶴下疑聽紫鸞笙

送廖主事還南京

題柱才名舊還官別意新柳花低撲酒山翠遠迎人去
馬嘶芳草嬌鶯惜晚春秣陵千里外飛夢更相親

漁村晚照

西岑瞰斜日滄波散晴霞返照在汀樹依依歸暮鴉漁
翁已收網沽酒來東家

洞庭秋月

風清白露溥水天同一色娟娟玉鏡懸皎皎金波溢推
篷望君山廣寒應咫尺

平沙落雁

隨陽離胡天作陣投沙渚影橫鄂浦雲聲斷衡陽雨水
留饒稻梁哀鳴竟何苦

瀟湘夜雨

滄江晚來雨恍若銀河傾千山擁暝色萬竹飄寒聲篷
窗有遷客淒然百感生

留城懷古

寂寞荒城泗水東昔人曾此遇真龍一編已向興王用

萬戶從教擇地封帶礪河山空往誓春秋祠廟想遺容
鄮侯下獄淮陰死三傑惟公伴赤松

送劉昌會試

早從侯類究羣經虎榜新題屬妙齡
驥出馬羣空北土鵬因鵬化運南溟
功名有待標青史禮樂行看對大廷
席上儒珍期自保一樽相送重丁寧

送韓僉事赴廣西

畫省為郎屬老成新持玉斧下瑤京
觀風好遂平生志

題柱多傳舊日名
路入三湘秋水迴
霜經五嶺瘴煙清
寸心不被炎蒸惱
長對冰壺夜月明

謁北京城隍廟

岌嶷城宇俯城闔
聖代褒崇賜額新
石刻盡題靈應事
香煙不斷往來人
經年樹暗長廊盡
落日風清古砌塵
粉署政閒來伏几
敢將心術愧明神

輓遂安周太守以謙

楚聲空擬大招辭
欲掛吳鉤失路歧
秋草故山行徑歿

春風楊柳閉門垂
范滂早重當時譽
黃霸多存去後思
閒向黃堂瞻皂蓋
幾人回首共淒其

和靖坐吟圖

茶鼎煙消鶴夢驚
水瓶香雪一枝明
人間詩思尋常有
不比西湖分外清

鵲

花甲填橋性最靈
春風栖息傍前庭
有聲未必皆為喜
空使人人側耳聽

附周敘

字功叙吉水人有石溪集

水竹居為冢宰王先賦

龍洲之上水竹有居其流澄澄其植渠渠流之澄矣植
之渠矣有美君子世焉居此天光雲影昭耀琅玕高標
直節棲鳳翔鸞引泉開逕臨清蔭綠天風徐來篩金戛
玉君子致身出登廟堂遙懷桑梓敬恭難忘對之伊吾
匪土是思其清其直婉德是宜武公睿聖詩詠淇澳允
矣君子願繼芳躅

文水送陳太守復任吉郡

文水瀾瀾遠有源委于贛于豐合流不已文水沄沄其
流成紋層瀾湧秀千古一春維水之秀維林巒之茂山
川鬱盤雄冠江右毓秀鍾靈賢才挺生孤忠大節日月
爭明郡侯戾止承流致理不亟不徐我民慰喜郡侯載
臨遂我民之心願言惠澤與文水同深

齋宿述懷

北風凜寒沍歲事倏已殘偕我二三友齋宿此盤桓言

談雜今古傾吐出肺肝秉燈屢易換不知清夜闌
宣伊朋情洽所貴衷赤殫屏營不敢寐常恐愧素餐
青青庭外栢奕奕架上蘭芳潔良自媚後凋堅歲寒

送宗叔子宣南歸

久適棲遯志曠然懷遠憂緬彼兩京路山川邈悠悠
所思在萬里豈必戀故丘金臺古形勝宮闕壯皇州
西接太行險東連滄海頭車書混萬國禮樂彌遐陬
歷覽愜真趣寧嗟歲月流

辭別二親

平生有壯志不解兒女悲茲晨出門去忽復傷乖離所
思別雙親萬里將遠違再拜辭膝下涕淚交兩頤去冬
在京國父書累見貽為言老母病衰羸殆難支念汝久
不見日夕長相思感此發深嘆傍徨若無依恨不生羽
翮清風度郊圻詰朝抗短疏頓首叩皇扉陳乞暫歸省
以慰臣母慈聖王敦孝理優詔特許歸憫臣懇悃意更
賜驛傳馳聖恩誠浩蕩已志尚驚疑歸來入里門問訊

從隣兒答云近平復踴躍喜無涯升堂展家慶小試編
欄衣童穉盡驚喜歡聲溢庭闈親顏倍欣懌顧問來何
時江湖多險艱道路邈逶迤况茲雪霜候恐復傷汝肌
起謝幸無恙祇慚歸省遲一荷父母庇再荷明主知剪
燭坐深夜開筵泛瓊卮偕我弟與兄獻壽語嬉嬉以茲
晨夕間定省得暫施於焉洽歡慶庶用伸我私歲序忽
云改東風振芳菲韶光不相待王事有程期促裝復載
道欲去不忍辭親故强我別何堪共淒其人生穹壤間

出處須合宜退當竭營養進當思有為我情兩難即徘徊欲何之浩歌向空碧引睇浮雲飛

寓愁

平生寡愁思今日何獨深所念在猶子羸病益見侵去歲暮春起纏綿直至今茲復歷春暮微軀豈堪任曉窗屢哽咽夜枕時呻吟一聞一驚顧痛哉割我心安得盧扁子與爾救危沈

過彭澤

我行過彭澤弔古心悠然寥寥千載上相繼惟二賢陶
公昔宰邑八旬賦歸田易姓不復仕甲子以紀年狄公
在當時忤旨來左遷一朝復唐祚忠義白日懸二賢去
不遠光價照簡編豈無繼承者胡乃寂不傳吁嗟世之
人才行真難全題詩懷往躅事業當勉旃

奉送大學士曾先生侍從東宮赴南京

望著鑾坡早官兼鶴禁榮儲皇承祀去天子詔陪行付
託同元老尊榮重列卿拜辭瞻衮冕宴餞集簪纓馳道

雲隨輦行宮月照營前星臨虎帳後騎繞龍旌
對論經籍從容納懇誠酒分銀笺烈詩寫綵毫
輕野迥晴看燒花深曉聽鶯漸過淮甸路遙指
石頭城日月開三殿山河壯兩京謁陵嚴禮秩
助祭秉寅清翊戴歸邦本歡娛洽衆情願揚匡
德業海內振英聲

泰和劉氏沙村江樓

勝地環江渚樓居俯岼沙
賈吞銀漢竇高傍碧空斜
曲徑低飛鳥長波漾落花
青藜宵隱映翠竹曉交加
林影

侵書幌川光上釣槎汀寒浮月露山晚護雲霞眺遠晴
偏適臨清景更佳桃源仙客境栗里逸人家一自登朝
著空驚歷歲華昔時遊賞處惆悵隔天涯

長淮水

長淮水日東注流盡年光祇如故亘古窮今不可極但
見行舟往來處長淮之水流滔滔映空浴日排銀濤鷗
鳬翻飛岼摇曳魚龍鼓舞風怒號濠壽西來如折斗汴
泗交流清會口滾滾寧辭東海遙萬里朝宗近趨走長

淮水涵華滋昔年淮右見龍飛
天河挽洗甲兵淨恩澤
汪洋合九圍長淮水今澄清
聖人繼統川岳寧龍驤萬
斛日克貢永奠皇圖歌太平

題秋林瞰泉圖

草堂住在清溪上雨歇秋林鬱森爽
幽人無事日憑欄
俯瞰流泉愜心賞泉流百折穿翠微
涼波粼粼秋日輝
飛空琮琤韻琴筑
澣石錯落翻珠璣
幽人對此情怡懌
頓覺煩襟坐來息
一聲何處歌滄浪
雲水蕭蕭動來碧

永嘉周孝子歌

颶風吹沙滄海翻魚龍鼎沸煙塵昏羣雄竊據宇內裂
縱橫殺戮相并吞吳山之東越江曲賊勢猖狂肆殘毒
平涼千里煙火稀豺虎縱橫繞空谷周家父子耽文儒
流離奔竄無安居一朝邂逅入俘虜倉皇寧顧千金軀
若翁視子心猶苦况是高堂有大母子欲捐生贖父身
願得承顏慰延佇強賊憑陵恣忍心縛之竟墜中流深
嗟哉孝子義不辱牽衣隨父行俱沈曩倫泯墜王網壞

白日無光泣神鬼長遣當年雙旅魂遺恨今猶結淵水
真人御宇誅強兇萬方盡入甄陶中史官采錄筆懿行
令名耿耿垂無窮

賦得清樽送楊長史先生南歸

前有樽酒聽我浩歌人生功成身既退對酒不飲當如
何疏傳還家頭未白散盡黃金宴賓客陶公晚賦歸去
辭醉倚東籬翫秋色先生早歲守名州曳裾更向王門
遊曾分光祿黃封釀屢泛宮筵白玉甌只今脫却朝簪

去歸隱雲林最深處時同北海倒芳樽日對南山得佳
句衡門三逕鎮長開載酒從人問字來興酣高卧北窗
下清風明月共徘徊

江山遠趣圖為襄城伯賦

長天極浦波溶溶巖巒秀沓青芙蓉生綃半幅圖遠趣
彷彿江山千萬里近郭名園不知處樓觀依微出深樹
細雨孤帆島外舟殘煙列騎花間路飛流百丈晴虹懸
危梁倒影丹崖巔樵逕多逢采芝客石林靜隱看棋仙

層層閣道雲連棧渺渺堤沙落歸雁劒門天闢窮勝遊
湘水秋高縱青盼我公心事非等閒豈必娛情圖畫間
意氣遙凌蔥嶺道聲光直動燕然山河青海晏昇平日
移鎮南都今第一丹青好寫麟閣容頌功更有如椽筆

古劒歌為明書宗蘊賦

良工冶鑄金鐵英鍊出寶劒真天成熒熒芙蓉比荷豔
猶如綠水涵秋清一從中道沈埋久紫氣猶能貫牛斗
沈埋夜夜想飛騰匣裏時時作悲吼君今得此耀細微

觀者拂拭光陸離防身震懾魑魅膽露鍔刺靡霜雪披
自來靈物神呵護願子殷勤重垂顧莫教佩服過延津
只恐跳波化龍去

送袁欽誠

少壯辭家去從師千里遊雨深廬岳樹天接漢江流夜
誦分漁火朝吟倚客舟遙知重會日春滿帝王州

挽祭酒胡先生

位望朝端重文章海內傳高風儀後輩古道繼先賢門

下三千士人間八十年如公保全節此日竟誰肩

送胡太守擢貴州憲使

登歷中朝白髮稀一官趨拜出彤扉
新辭虎竹分金節重惹龍香滿繡衣
棠樹成陰循吏去柏臺持憲遠人歸
多君早負澄清志此去應知願不違

渡江望南京有作

驛路南來四十程舟人遙指到神京
雲晴乍見青山出風便寧知白浪驚
萬里歸心隨片月十年離思遶重城

清時自信功名早擊楫何須羨祖生

洛陽懷古

春風弔古洛城邊一望川原思渺然綠野堂堙空宿燕
洛陽城廢不聞鶻成周故國寒煙外汴宋諸陵夕照前
獨有澗邊流水在滄波東去自年年

送王修撰謝病歸會稽

高步雲衢二十年新恩特許暫歸田文園病渴憐同告
親舍承顏羨獨賢客路迥臨吳苑外鄉山遙倚鑑湖邊

別來相憶心應切
夜雪思乘剡曲船

送黎太守潛輝赴南京

秋夜沈沈禁漏長
錦筵紅燭對離腸
宦遊早散辭知己
客思明朝歎異鄉
楊柳驛亭山靄碧
芙蓉江路水風涼
雲衢莫怪蹉跎久
材大終應柱廟堂

送余侍講致仕南歸

儒林盡拜渥恩新
勇退如公復幾人
丹鳳樓前初解組
白鷗江上漫垂綸
香山會好誰同社
彭澤風高自卜隣

愧我有親違省問南歸無計接芳塵

賜遊萬歲山

退講經筵出禁林廣寒宮殿賜登臨
波浮菡萏千花艷幽接蓬萊萬樹陰
日下龜魚翻鏡影風前鸞鶴雜韶音
儒臣際此非常會共荷皇恩似海深

正月朔陪聖駕幸太學

聖主崇儒幸辟雍羣仙鵠立候飛龍
冕旒祇肅祠先聖環珮從容導秩宗
講罷諸生聆戒諭禮成千載慶遭逢

日高輦路回鸞馭萬歲聲中祝華封

次武昌

三楚名藩地望雄層城百雉倚晴空磯頭黃鶴仙人館
雲表朱門帝子宮控引荆襄天設險會通江漢水朝宗
胡牀吹簫南樓興想得羣公月夜同

遊楊鴻臚南園

御河繚繞禁城東路入南園興不窮樹色萬行晨過雨
鳥聲千囀午呼風門通夾徑芙蓉帳闌護翻階芍藥叢

勝景滿前看不足酒酣吟倚夕陽紅

試院閱卷之餘偶成錄似同事諸君子

棘闈近接禁垣東愧典文衡秉至公
五色肯教迷日下一心寧許揭天中
階前雨激簷花白簾底風搖燭影紅
得士願如龍虎榜贊襄鴻化副宸衷

南京翰林三年秩滿偶書所懷

涼風殘雨乍晴天牒却銅章赴日邊
儒官五朝凡五德沾恩三十又三年
欺人白髮千莖改報國丹衷不日懸

便擬乞身營別墅冶城山畔白門前

題朱善慶竹泉卷

庭栽綠竹自清幽更引寒泉入檻流
鏡影淨涵淇澳霧金聲遙夏渭川秋
陰凝翡翠煙光合潤浥簾櫳雨氣浮
更說蔣生能賦詠坐看三逕思悠悠

江上行

江流昨夜添新雨綠樹流鶯嬌不語
三三白苧冶遊郎兩兩紅粧浣紗女
青山江上峙嵯峨江中新水生洪波

畫船撾鼓凌風去兩岼春聲雜櫂歌

題鷹熊聽澗圖

孤鷹奮迅秋雨前老熊怒觸蒼崖顛
寧姿猛態真奇物
敝翼共聆清澗泉乃知畫者寄深臆
英雄聽諫良難得
文皇不作魏公老展卷令人增慨息

湘川雜詠

登樓高處謾躋攀十二欄
干夕照間樹色滿堤芳草綠
不勝清思遶湖山

汨羅近與湘川接日暮停舟弔屈魂遺恨萬年流不盡
至今光價照乾坤

石倉歷代詩選卷三百五十四